

# Onn da grond success e cumià d'in bun president

Banca Chantunala Grischuna

■ (anr/gc) La radunanza annuala da participantas e participants da la Banca Chantunala Grischuna (BCG) è senza dubi il pli grond cumin ch'i dat en noss chantun. Era uonn èsi stà pli che 2500 persunas che han emplenì la vasta halla da fiera a Cuira sin il davos plaz. Ellas èn vegnidas infurmadas orai fer dal CEO e dal president partent davart l'onn da fatschenta 2013 da la BCG. Ils scrìts da participaziun han purtà ina dividenda da 38 francs ed al chantun èn ids 83 milliuns francs dal gudogn – u 427 francs per abitant.

Ins ha prendì cumià cun engraziar al president partent da la BCG, Hans Hatz, e fatg bainvegni a ses successur Peter Fanconi che ha persvas tras sa preschentar. – La rama musicala ha l'orchester Pepe Lienhardt procurà cun melodias che han plaschi ed entusiasma fitg.

## Augmentà il gudogn

Tenor il CEO, Alois Vinzens, ha l'onn surpassà las spetgas e confermà che las decisiuns strategicas ed operaziunalas sajan stadas gistas. I saja stà in bun onn da fatschenta. La summa da bilantscha è surpassada per l'emprima giada il cunfin da 20 milliardas francs. Il gudogn dal concern ha muntà ad 1,6%. Zunt confortabla è da dotaziun cun agens meds, in segn per capacitads da pudair supportar ristgas. La BCG valia sco in institut bancar segir. A cor stat a la BCG ch'il Grischun restia attractiv.

## Optica e cumià dal president Hans Hatz

Las prestaziuns da la BCG sa basian sin la confidenza e la fidaivladad da la clientela. Quai ha il president partent, Hans Hatz, constatà a l'entschatta. L'occurrènza imposanta pussibileschia onn per onn da render visibla e perceptibla la ferma colliaziun tranter la banca ed ils proprietaris. Quai è adina puspè reussì orai fer al president partent Hans Hatz.

Persuenter al ha cuss. gov. Barbara Janom Steiner engrazià fitg e resentidamain en num da la regenza. El è vegnì tschernì 1990 en il Cussegl da la BCG ed è dapi 1997 parsura da quella. Hans Hatz haja chapì orai fer da francar la BCG en noss chantun e da sa colliar cun il mund tras sviluppar visiuns e recepts per crescher cuminaivlamain. Sco ministra chantunala da finanzas sa ella bun grà per ils blers milliuns da la BCG ch'èn vegnids da bun ils davos onns a la chassa chantunala. Noss chantun possia esser losch da sia banca.



Il CEO da la BCG Alois Vinzens, il parsura partent Hans Hatz e ses successur Peter Fanconi.



Imposant è il maletg da la halla da fiera a Cuira bain emplenida da participantas e participants.

FOTOS MAD

## Preschentà ed udi il nov parsura

Sco successur da Hans Hatz ha la regenza elegì il november passà Peter Fanconi, burgais da Puschlav. Dapi il 1 d'a-

vrigl 2014 è el en uffizi tar la BCG. Il nov president disponia – segund cuss. gov. Barbara Janom Steiner – da gronda cumpetenza e blera experientscha sin il sectur da bancas. Il nov parsura Peter

Fanconi engrazia per la confidenza demussada. El haja stretgas relaziuns cun il Grischun ed è dal reminent in biadi dal renumà pediater Guido Fanconi (1892–1979). En il center stettia tar el

ina strategia per la BCG senza memia autas ristgas. El saja avert ed interessà da sa laschar direger da vair senn interdependent ed agir realisticamain lasuenter.